

SÈRÎNE-NOS SKIZOFRINNE ?

A tanawète on nos sicrît èt nos v'la tot bièsse kand l' momint èst vnu d' rêsponde. On s'va tot d'minme s'î mète po l' shûvante k'a l'air di tracassî sakants d' nos lîjeûs :

“Ene sacwè ki m' sibare sovint, c' est comint çki vos fjhoz po potchî d' ene façon di dessiner (metans, li cene del pådje 45 di Rabulet) a ene ôte (metans, li pådje 49), et adon co ene ôte metans, l' istwere di ...). N' serîz nèn on pô skizofrinne su les bwards? “

Oufti ! Vl'a ène kèsse k'èle èst boune... come on dit kand on s' dimande c'k'on poréve Bén dire po nèyî l' pèhon (“peon” mandaye dès tchamps amon lès èspano-causants). Ardant, on s'va dispêchî d' voye kwè è Larossète : .

Skizocéfale : Onk (on monsse) k'a l' tièsse findeuwe è deus b'bas au wôt come on ddrî. M' mirwè mi l'riclape ètîre, néni po mi

Skizocèle : On trau dins l' cwârp k'a comincé pa ène craye inte li pia èt lès tripes. Mmm... m'faura p'tète m'fé fé one radiografêye d'mi au didins po vîre kwè. On n'sé mauy.

Skizodontes : c'èst dès moles èt come dji saye di m' radeuri, passons à

Skizogamie/skizodjinnêze : manîre di s' rinde popa è s' côpant è deus. È mi, wêre ki richène auzès vièrs ki pratikenut c' “clonaedje” la. Èt dji seu nèn prêsse à prinde ène paire di cizètes!

Skizogone : ça s' dit pou dès cèlules ki balzinenut inte mozète èt muzète, inte vwèle èt buwêye. Po m' paurt c'èst pu rade l' pèpion ki m' assatche, adon...

Skizografiye : wachotådje dins li scrît linwådje pa plafonådjes èt raclapådjes di vrayi mots dsus dès ratournûres noûves ovêyes. Vêci, i m' faut l' admète, ça m' djont on miète. Pa côps, dji m' pou lèyî d'aler à dès ècomèlaedjes – c'èst sovènt avou l' “linwe dins l' pouyète” (the tongue in the *chick*) as the British are sovènt dijants – mins c' èst branmint mwinsse k' on transsineus bouteus do fén fond do rfond ☺.

Lès **skizomètamerîye**, **skizomètope**, **skizomicète**, **skizoneura**, **skizonte**, **skizopeltides** èt **skizopètaulon**, dji m'va lès zoupler oute paski c'èst dès trop droles di bièsses ki vos n'avoze k' a fé tot seu leu conchance. Nos vla t-à

Skizofaziye : fèl sikètaedje do linwaedje k'on pout trover amon sakants ki, co tot djonnes, toûnenut sots. I parèt k' è l' skizofaziye, li linwaedje èst comachî d' mots d' tos lès djoûs avou dès noviatés fwârdchjîyes à pîces èt à fait. Po fini, ça done on bèrdèlaedje ki s' sipaud sins djoke èt otomatikemint. Dins c'

cit'ca, l' âdje èst là po m' è tinu oute...ça n' m'èspêche nèn d' pinser k'i gn'a deus-trwès ki... Cccchttt, on n' va nèn racuzer, ènn'don.

Skizofrinnye : psikôze ki s' atake auzès djonnes èt k'on pout riconèche passe k'èle disossone lès psichikes mwinnaedjes. Lès psikiâtes, sont sovènt d' acwaurds po aurder “skizofrinnye” po lomer lès atakes do “doû-doû” amon lès djonnes èt lès omes ki n'ont nèn co pris trop d'âdje. Comint s' è z-è rinde conte ? Di deus manîres : **1.)** L' malåde dimère dsus l' minme idêye è s' tièsse, i dit nonna aus ôtes, i r'vint todi à rlaye dsus l' minme cayèt, i fait dès manîres po on rén (n'awè k'sès propès idêyes d' bounes, s'sinte mau po on rén, n' iesse pus d' astok dins sès molières : ça n' bome pus djusse è li); **2.)** I s' côpe dès ôtes, disloye tos lès loyins, mèt dès baurîres, rathe dès vètos, evd.) A tos cès grumias polenut co s' raclaper dès fiksès idêyes avou dès djôzaedjes mau batis, evd. L' skizofrinne a plêji à mète lès ôtes foû di s'cèkle èt s' plinde di dmèrer tot seû à z-î bouter. Po c'ki èst do rmède, dins l' timps on n' côzéve ki d' rèsèraedje è l' ostau po z-î doner à s'n' auje dès bounès drines. Au djou d' audjourdu on a pus auji avou dès rapaujantès drogues mins ça n' poréve si Bén n' arindjî k'po 25 malaudes au cint. Si vos è vèyoze onk dins vosse vichnauve, vos ploze ièsse pèssimisse por li

Tot Bén conté, po nosse paurt, i nos chène k'on z-a passé l'âdje d'ièsse skizofrinne èt on s' astoke Bén po rastaurdjî l' alziminraedje...

Po cki èst dès imaudjes : è lès pådjes 39, 40, 41, 42 c'èst dès vîjerîyes d'i gn'a d' pus 40 ans, è lès 45, 46, 52 c' èstéve, come on vl'a dit (Marina), po one têze –si-ya- i gn'a cauzu 20 ans (mins on a kandjî lès filaktères), è l' 49, 50, 56, c' èst po vos fé glèter one miète tot rwêtant à nèn ièsse pus pornocrate ki l' Namurwès Fèlicyîn. Po cki èst dès istwères (BD), on va au pus rade èt au mwins pèsant è octèts po ls' èvoyaedjes. Dèdja k'on nos trove loûrd mins on n'nos supwatréve nèn pèsant. Po chake pådje on saye di dmèrer pa pa-dzos lès 50 K. One imaudje, tote seule, nèn rastrindeuwe, èst sovent dins lès 3 M. d' octèts. L' vrayi portrèt dèl pådje 13 (dèdja è l' 55 di 2001) fait dins lès 50 x 70 cintimètes. L' postûre à l' 16 èst grande di deus mètes.

RABULÈTS n'èst, après tot come on vl'a dit –i gn'a lontimps- k'i l' brouyon d'one saye sins prètincion ki vout pèter èt spiter sès alumwâres pa tos costés po ptète n' ralumer k'on richandichant ptit feu... Kèkfîye k'on djoû on mètra tot ça au prope po dès cints èt dès miles di lîjeus ?... On pout todi rêver, ènn'don ?



A môde di rén, on comache dispû d'pus d' 410 pådjes ! Faléve-t-i l' fé ?